

- 1' Ritter Peter von alten joren
- 2' Jch muß üch griffen an die oren
- 3' Mir gdenckt / das wir beyd narren woren
- 4' Wie wol / jr füren ritters sporen



Von grossem ruemen

- 1 Die gäcken / narren / ich ouch bring
- 2 Die sich berümen hoher ding
- 3 Vnd wellent syn / das sie nit sint
- 4 Vnd wänen / das all welt sy erblyndt

n iij

5 Man kenn sie nit / vnd frog nit noch /
 6 Mancher will edel syn / vnd hoch
 7 Des vatter doch macht bumble bum
 8 Vnd mit dem küffer werck ging vmb
 9 Oder hat sich also begangen
 10 Das er vacht mit eynr *stâheln* stangen
 11 Oder rant mit eym juden spieß
 12 Das er gar vil zû boden stieß
 13 Vnd will das man jnn juncker nenn
 14 Als ob man nit syn vatter kenn
 15 Das man sprâch / meyster hans von Mentz
 16 Vnd ouch syn sün juncker Vincentz /
 17 Vil rûmen hoher sachen sich
 18 Vnd bochen stâts zû wider stich
 19 Vnd sint doch narren jn der hut
 20 Als ritter Peter von brunndrut
 21 Der will das man jm ritter sprech
 22 Dann er zû Murten jn dem gstech
 23 Gewesen sy / do jm so not
 24 Zû fliehen was / das jm der kot
 25 So hoch syn hosen hatt beschlembt
 26 Das man jm wâschen muß das hembd
 27 Vnd hat doch schilt vnd helm dar von
 28 Brocht / das er sy eyn edel man
 29 Eyn hapich hat farb wie eyn reyger
 30 Vnd vff dem helm eyn nest mit eyger
 31 Dar by eyn han / sitzt jnn der muß
 32 Der will die eyger brüten vß
 33 Der selben narren fyndt man mer
 34 Die des went haben gar groß ere

10 stâheln] stâcheln GW5046 34 ere GW5041 GW5046] er GW5047

35 Das sie sint vornan gwesen dran
 36 Do es woltt an eyn fliehen gan
 37 Lügten sie hyndersich langzyt
 38 Ob jnn noch kämen ouch me lüt /
 39 Mancher seyt von sym vächten groß
 40 Wie er den stach / vnd jhenen schoß
 41 Der doch von jm was wol *als* wytt
 42 Er dāt jm mit eynr hantbüchß nüt /
 43 Vil stellen yetz noch edeln woppen
 44 Wie sie füren vil löwen doppen
 45 Eyn krönten helm vnd guldin feld
 46 Die sint des adels von Bennfeldt
 47 Eyn teyl sint edel von den frowen
 48 Des vatter saß jn rūprecht owen
 49 Synr müter schiltt gar mancher fūrt
 50 Das er villicht am vatter jrirt /
 51 Vil hant des brieff vnd sygel gūt
 52 Wie das sie sint von edelm blūt
 53 Sie went die ersten syn von recht
 54 Die edel sint jn jrm gschlecht
 55 Wie wol ichs nit gantz stroff noch acht
 56 Vß tugent ist all adel gemacht
 57 Wer noch gūt sytt / ere / tugent kan
 58 Den halt ich für eyn edel man /
 59 Aber wer hett keyn tugent nitt
 60 Keyn zūcht / scham / ere / noch güte sytt
 61 Den halt ich alles adels lār
 62 Ob joch eyn fürst syn vatter wer
 63 Adel alleyn by tugent stat
 64 Vß tugent aller adel gat /

41 als] fehlt GW5046

65 Des glich / will mancher doctor syn
 66 Der nye gesach Sext / Clementin
 67 Decret / Digest / ald jnstitut /
 68 Dann das er hat eyn pyrment hut
 69 Do stat syn recht geschriben an
 70 Der selb brieff wißt / als das er kan
 71 Vnd das er güt sy vff der pfiff
 72 Dar vmb so stot hie doctor Gryff
 73 Der ist eyn gelert / vnd witzig man
 74 Er gryfft eym yeden die oren an
 75 Vnd kan me dann manch doctor kan
 76 Der ist doch jn vil schülen gstanden
 77 Jn nohen / vnd jn ferren landen
 78 Do doch die göuch nye kamen hyn
 79 Die mit gvalt went doctores syn
 80 Man muß jnn ouch herr doctor sagen
 81 Dar vmb das sie rott röck an tragen
 82 Vnd das eyn aff jr müter ist /
 83 Jch weiß noch eynen heysßt hans myst
 84 Der will all welt des vber reden
 85 Er sy zû Norwegen / vnd Schweden
 86 Zû Alkeyr gsyn / vnd zû Granat
 87 Vnd *do* der pfeffer wechßt / vnd stat
 88 Der doch nye kam so verr hyn vß
 89 Hett syn müter / do heym zû huß
 90 Eyn pfannküch / oder wüerst gebachen
 91 Er hetts geschmeckt / vnd hören krachen /
 92 Des rümens ist vff erd so vil
 93 Das es zû zålen nãm groß wile
 94 Dann yedem narren das gebryst
 95 Das er will syn / das er nit ist

87 do] fehlt GW5046